

Sistema na Aruba ta rekeri cu un partido mester tin sponsor grandi of haci hopi recaudacion di fondo

Informacion a bira un negoshi caro, segun Marisol Tromp

Pa un informacion yega na comunidad e ta rekeri placa y esaki ta particularmente e caso durante un campana politico. Esaki segun Marisol Tromp den e ultimo parti di e combersacion amplio cu Bon Dia Aruba a tene cu e lider di MAS, un persona cu despues di 27 ana, cu excepcion di un pausa cortico, pronto lo ta pafu di e mundo politico formal di Aruba.

Pa Tromp, locual mas a hala su atencion na 2024 ta e placa cu mester tin pa por haya espacio na media. E por conta riba un man cuanto media a permitie duna un entrevista sin cu a cobra p'e. "Bon Dia Aruba, e radio di Johnny Habibe, Mimi Rosel Koolman ta esnan cu no a cobra mi pa entrevista. Pero tur otro radio, incluso television tabata kier pago pa un entrevista. E sumanan tabata halto. E sistema aki ta forsa cu un partido no por funciona sin un sponsor grandi of sin un recaudacion grandi."

Segun e lider di MAS, prijsnan ta varia si ta permiti un espacio di 10, 15 of 30 minut. For di 500 florin pa 1000 florin pa candidato, pa biaha. "Den otro palabra, si kier bay riba articulo di e media, aparece den e orario di noticia media, haya mencion riba nan pagina social, lo mester a paga un suma di 35 mil florin. Nos di MAS no por a paga e cantidad ey. Pues mi sa ken si por a paga pasobra nan a aparece den e sistema di cobertura aki." E realidad nobo aki ta crea un situacion cu placa ta hunga un papel mas grandi cu nunca y e pre-



gunta ta si un partido ta dispuesto pa haci e sacrificio pa haya e tipo di cobertura aki y haya exposicion asina, e lider politico a bisa.

Nada ta spontaneo

Segun Marisol Tromp, na momento cu realisa cu ora cu media ta haci comosifuera a topa cu un politico ta yega na Camara di Comercio y ta tene entrevista cune, e votado Arubiano mester ta consciente cu no tabata algo spontaneo, sino cu tabatin intercambio di placa. "Esey ta nifica cu otronan cu tambe a acudi na eventonan no ta haya cobertura y ta crea un impresion den comunidad comosifuera e politiconan cu no ta paga of no tin forma di paga, no ta haci nan esfuerzo."

Placa semper a hunga un papel den campana, e politico

experiencia a bisa, "pero ami a yega di draai sin hopi placa. Esey a sosode na 2021. E bi-aha aki, practicamente no por a saca ningun comunicado sin paga, pasobra ta considera tur cos 'exposure politico,' sin considera mes e aspecto noticioso." Segun Tromp, e tabata imposibel pa un partido manera MAS cu a recauda fondo, pero obviamente no suficiente pa paga sumanan grandi, haya e cobertura necesario pa yega na comunidad. "Bo ta mira ken a ricibi hopi atencion, y awor por compromete ken tabatin mas placa."

Sour grapes?

Marisol Tromp a sigura cu e no ta djis expresa su mes di e forma aki pasobra el a perde. "Mi a bay un total di ocho eleccion aki na Aruba y nunca mi a wak e extremo aki. Semper tabata paga si tabatin propaganda, cu ta algo logico. Pero diripiente, como Parlamentario, pasobra ta den periodo di eleccion, ya no por duna un declaracion sin cu a considera esaki como propaganda politico. Hasta si ta papia di casonan serio di Gobernacion. Pasobra tabata den periodo di eleccion, diripiente hasta informacion crucial pa comunidad tabata rekeri cu mester paga. Y hasta si yama conferencia di prensa, si no ta paga pa otro articulonan, simplemente e periodistanan no ta aparece. Sigur no si algun ta traha pa Gobierno tambe."

E realidad nobo aki ta haci



hopi dificil pa partidonan cu no tin un forsa financiero grandi, pasobra no por yega na comunidad sin mas y ta comosifuera "cu bo no t'ey, ta manera cu bo no ta existi. Diripiente, nada di e partido ta keda publica, alomenos ta un atake di otro." Marisol a bisa el a bira yamativo pe na October, despues cu a entrega lista di candidato. "Mi no ta bisa cu MAS no kier a paga. Pero e ta abnormal si e sumanan halto cu ta forsa organisacionnan busca sponsor grandi si kier cualkier cobertura of mester a prepara pa ananan."

Bon Dia Aruba

E medio di comunicacion, Bon Dia Aruba, no ta cobra pa entrevista. Locual si tin ta un maneho di distribucion di

comunicado cu ta bin di politiconan. Si ta trata di opinion politico, sin un aspecto noticioso, ta publica esaki den e seccion di opinion.

Di otro banda, revistanan mensual, semper a cobra pa entrevistanan politico, ya cu ta considera esakinan promocion pa e politico. Pa loke ta seccion di noticia na radio, e ta keda un maneho di cada editor. Segun Baboe Hoek, algun medio na Aruba semper a cobra pa entrevista. "E no ta algo di awor. Ami ta un di e poconan cu no ta cobra y particularmente e websitenan di noticia ta cobra," Sr. Hoek a comenta.

Patrick Paskel di 24ora a bisa cu durante campaña ta cobra politico pa entrevista, pero normalmente no ta cobra.

